

- *1. مرکزی وزیر ڈاکٹر جتندر سنگھ نے بہدرواہ ماہہ 2 روزہ لوینڈر میلہ غو افتتاح کیو ہے۔
- *2. جے اینڈ کے اپنی پارٹی غالیڈراں نے سرینگر ماہہ لیفٹنٹ گورنر منوج سنہا سنگ ملاقات کی ہے۔
- *3. سینکڑاں غی تعداد ماہہ کشمیری پنڈت طبقہ غا یا تری کھیر بھوانی میلہ ماہہ شرکت غی خاطر وادی کشمیر روانہ ہو گیا ہیں۔
- *4. جے اینڈ کے محکمہ سیاحت غی طرفوں پلک تیں ڈوگری فوڈ فیسٹول شروع کرایو جا رہیو ہے۔
- *5. تے مرکزی سرکار غی طرفوں آئندہ 78 واں یوم آزادی غی تقریب ماہہ شمولیت غی خاطر، ایسے، ویڈیو تے فن مصوری ور مبنی مقابلہ کرایا جا رہیا ہیں۔

خبراں غی تفصیل نال پہلاں باغ علی طاہر۔

Lavender Festival

ضلع ڈوڈہ غا بہدرواہ گورنمنٹ ڈگری کالج ماہہ سی ایس آئی آر آئی ایم جموں غی طرفوں اج تیں تیجو لوینڈر میلہ منعقد کیو جا رہیو ہے۔ اس دو روزہ لوینڈر میلہ غو افتتاح مرکزی وزیر مملکت ڈاکٹر جتندر سنگھ نے کیو۔ یوہ میلہ علاقہ ماہہ لوینڈر غی کاشتکاری غی کامیابی تے اس غی بدھتی مانگ غے پیش نظر منعقد کیو جا رہیو ہے۔ جس غے دوران لوینڈر غی پیداوار تے اس غی بکھ بکھ قسمیں غی قیمتی اشیاء غا سٹال لایا جا رہیا ہیں۔ جن ماہہ ضروری تیل، صابن تے کا سیمیٹیک یعنی آرائشی سامان شامل ہے۔ ڈاکٹر سنگھ نے اس موقع ور لایا گیا بکھ بکھ سٹالوں ناہہ دیکھیو تے مقامی کاشتکاراں تے کاروباریاں غی کوشش ناہہ سراہیو۔ جنہاں نے بہدرواہ ناہہ خوشبوہات غی کاشتکاری غو مرکز بنان ماہہ اہم کردار ادا کیو ہے۔ اس موقع ور لوکاں سنگ خطاب کرتاں واں ڈاکٹر جتندر سنگھ نے مقامی کساناں غی طرفوں روانیتی کاشتکاری تیں اعلیٰ قیمت آلی لوینڈر جیسی فصل اگایا جان در منتقلی غی تعریف کی۔ اس موقع ور بولتاں واں ڈاکٹر جتندر سنگھ نے کہیو۔ بانٹ۔

LG Deligation

جموں کشمیر اپنی پارٹی غا پارلیمانی امور بارے کمیٹی غا چئیرمین محمد دلاور میر غی قیادت ماہہ جموں کشمیر اپنی پارٹی لیڈراں غا اک وفد نے سرینگر ماہہ لیفٹنٹ گورنر نال ملاقات کی ہے۔ اس وفد ماہہ محمد اشرف میر، رفیع میر، بلال احمد شاہ، عبدالمجید پٹر تے منتظر محی الدین شامل تھا۔ وفد نے پاکستان غی طرفوں کی گئی گولہ باری غی وجہ نال متاثر ہوا کُنباں غی بھلائی بہتری سمیت لوکاں غا دوجا بکھ بکھ اہم معاملات، سیاحت سیکٹر ناہہ بابدو دین

تے قدرتی آفات نال نمڑن پارے طور طریقان نانہ ہور بہتر بنان نانہ اُجاگر کیو گیو۔ ملاقات غے دوران وفد غی طرفوں اُجاگر کیا گیا معاملات غا حل واسطے مناسب کاروانی کرن غو ایل جی نے یقین دتو ہے۔

Khair Bhawani Mela

سخت حفاظتی بندوبست مانہ اج 60 بساں مانہ سوار ہو غے سینکڑاں غی تعداد مانہ لوگ کھیر بھوانی میلہ مانہ شرکت غی خاطر وادی کشمیر در روانہ ہوا ایں۔ اس میلہ مانہ شرکت کرن آلا افراد مانہ زیادہ تر کشمیری پنڈت طبقہ غا افراد شامل ایں۔ یوہ میلو پرسوں 3 جون نانہ گاندر بل ضلع غا تلملا غا مقام ورماتا کھیر بھوانی شرانن غا تاریخی مقام ورم منعقد کیو جا رہیو ہے۔ آکا شوانی جموں غا نمائندہ نے جانکاری دیتاں وادسیو ہے جے کھیر بھوانی میلہ پنج رنگنیا بھگوتی شرانین تلملا، منزگام، کلگام غا دیوسر، آننت ناگ مانہ لوگری پورہ تے کپواڑہ غا ٹکر غا مقام ورم منعقد کیا جائیں گا۔ اس موقع ورم بولتاں واد رلیف تے باز آبا دکاری محکمہ غا کمشنر آروند کیروانی تے اک یاتری نے اس راہ اپنا تاثرات ظاہر کیا۔۔۔ بانٹ۔

WKC Raising Day

جموں غا نگروٹہ مانہ اج فوج غی وانٹ ناٹ کور غی طرفوں 53 ورم تا سیس منایو جا رہیو ہے۔ جی اوسی سولویں کور غا لیفٹنٹ جنرل پی کے مشرانے اس موقع ورم ”آشوامدھ شوریاستھل ورم روائیتی پھلاں غی چادر چاڑھ غے شہیداں نانہ خراج عقیدت پیش کیو۔ اس موقع ورم جگہ اس جگہ 108 فٹ اُچا ترنگا نانہ لہرایو گیو۔ یوہ جھنڈو بھارتی فوج غی وطن پرستی غا غیر متزلزل جذبہ، یکجہتی تے قوم غے تئیں بے لوث خدمت غو مظہر ہے۔ وانٹ ناٹ کور پہلی جون سن 1972 مانہ شمالی کمان غا اک حصہ غا طور ورم بنائی گئی تھی۔ اس کور غی طرفوں تمام اوپریشان تے تخریب کاری غی کاروانیاں مانہ قابل تعریف کردار ادا کیو گیو ہے۔

Summer Vacations

اسکول ایجوکیشن جموں غا ڈائریکٹر غا دفتر غا اک حکمنامہ غے مطابق گرمائی زون غے تحت آن آلا صوبہ جموں غا تمام سرکاری تے تسلیم شدہ نجی اسکولاں مانہ 7 جون تیں 16 جولائی توڑی گرمیاں غی چھٹیاں غو اعلان کیو گیو ہے۔ اساتذہ نانہ کہیو گیو ہے جے وے طالب علمان نانہ آن لائن رہنمائی غی خاطر چھٹیاں غے دوران وی دستیاب رہیں۔ ڈائریکٹر برائے اسکولی تعلیم جموں نے یوہ وی خبردار کیو ہے جے اسکول غا سربراہان یاہ پھر تدریسی عملہ غی طرفوں تعمیل نہ کیا جان غی پاداش مانہ آن غے خلاف ضابطہ غے تحت کاروانی عمل مانہ آئی جائے گی۔

مزید خبراں نال عبدالمجید۔ ور اُس تیں پہلاں یوہ پیغام۔(یہ خبر تم آکاشوانی جموں تیں سُن رہیا ہیں، تے یہ خبر مہاری ویب سائٹ نیوز آن آنیر ڈاٹ گوو ڈاٹ ان ور وی دستیاب ہیں، اس تیں یہ (خبر مہاری موبائل ایپ تے ڈی ٹی ایچ ور وی دستیاب ہیں

Tourism Jammu

جموں کشمیر سیر سفاح محکمو پلک تیں 5 جون تک امن ترن ستواری مانہ ڈوگری فوڈ فیسٹول گو انعقاد کر رہیو ہے۔ اس تقریب مانہ گرائیاں غا ڈوگری کھانا، روایتی مٹی غا برتن، براہ راست پیش کش، مہندی لان غو فن، تے اونٹ غی سواری وی پیش کی جائے گی۔ یاہ تقریب مقامی ثقافت تے کھانا غو اک جشن ہے۔ محکمہ سیاحت نے لوکاں تے سیلانیاں نانہ دعوت دتی ہے جے وے ڈوگری کھاناں غا ذائقہ تے اس منفرد ثقافتی اجتماع تیں لطف اندوز ویں۔ اس دوران سیر سفاح محکمو 4 جون نانہ بہدرواہ ثقافتی شام غی میزبانی وی کر رہیو ہے۔ جس مانہ مو سیقی تے ثقافت نال جڑیا بکھ بکھ پروگرام پیش کیا جا ویں گا۔ مقامی فنکار دِل نانہ چھون آلی مو سیقی غی دھناں تے پیش کش نال سامعین نانہ محضوظ کریں گا۔ ضلع دوڈہ غی خوبصورت وادی بہدوارہ مانہ اس تقریب غی شام مانہ شامل ہون واسطے لوکاں تے سیلانیاں نانہ مدعو کیو گیو ہے۔

Various competitions

مرکزی سرکار آج تیں آئندہ 78 واں یوم آزادی غی آمد تیں پہلاں بکھ بکھ عنواناں ور نوجواناں بشکار 2 زبانان مشتمل مضامین تحریر کیا جان ور مبنی مقابلہ کرایا جا رہیا ہیں۔ یہ مقابلہ جن عنواناں ور کرایا جا رہیا ہیں، اُن مانہ او پریشن سندور تے دہشت گردی غے خلاف بھارت غی نویں پالیسی شامل ہیں۔ استوں علاوہ سماجی میڈیا مانہ اثر رکھن آلا نوجواناں نانہ ویڈیو تے ریل بنان غی دعوت دینو وی مقابلاتی عنوانات مانہ شامل ہے۔ جہیڑا بھارت غی آزادی سنگ منسلک کسے وی یادگار یاہ ایسا مقام ور جا غے ویڈیو ریل بنا سکیں گا۔ اس غے علاوہ نوجواناں مانہ فن، مصوری غا مقابلہ وی کرایا جائیں گا۔ ان مقابلان مانہ شرکت کرن غا خواہشمند نوجوان مزید تفصیل غی خاطر ویب سائٹ مائی گوو وروں جانکاری حاصل کر سکیں۔ یہ مقابلہ وزارت دفاع تے مائی گوو انڈیا غا تعاون سنگ منعقد کرایا جا رہیا ہیں۔ جہیڑا اس مہینہ غی 30 تاریخ توڑی کرایا جائیں گا۔

Udhmapur Environment Day

بھارت سرکار غی طرفوں جاری کی گئی صلاح غے تحت جے اینڈ کے آلو دگی کنٹرول بورڈ غی طرفوں آئندہ 5 جون نانہ عالمی یوم ماحولیات غے پیش نظر گو رنمنٹ ڈگری کالج ادھم پور مانہ اک پیشگی مہم شروع کی گئی۔ جے اینڈ کے آلو دگی کنٹرول بورڈ غا ممبر سیکریٹری گھنیشام سنگھ غی قیادت مانہ ضلع مانہ یوہ بیداری پروگرام شروع کیو گیو ہے۔ جہیڑو آئندہ 5 جون توڑی جاری رہے گا۔ عالمی سطح ور پلاسٹک غی آلو دگی غا خاتمہ غا عنوان سنگ شروع کی جان آلی اس مہم غو مقصد طالب علمان مانہ ماحولیاتی معاملان بارے جانکاری دینو، نالے ماحول دوست سرگرمیاں نانہ فروغ دینو ہے۔ اس موقع ور لیکچر، مباحثاں تے مقابلان غو انعقاد کیو گیو۔ تانجے

طالب علمان نانہہ ماحولیاتی تحفظ غی اہمیت با رے بیدار کیو جا سکے۔ اس با رے گل کرتاں واں
جے اینڈ کے آلودگی کنٹرول بورڈ غا ممبر سیکریٹری گھنشاں سنگھ نے کہیو۔۔بائٹ۔

IPL

اج احمد آباد مانہہ نریندر مو دی اسٹیڈیم مانہہ ممبئی انڈین تے پنجاب کینگس بشکا ر آئی پی
ایل 2025 غو کوالیفائر 2 غو مقابلو کھیڈیو جا ئے گو۔ یوہ میچ شام ساڈھے 7 بجے شروع وے
گو۔ اس مقابلہ نانہہ جتن آلی ٹیم منگلواریں رائیل چیلنجرس بنگلور و نال آئی پی ایل غو فائنل
کھیڈے گی۔ یا درہ جے اجوں توڑی ممبئی انڈینس نے آئی پی ایل غا 5 خطاب جتیا ہیں۔ پنجاب
غی ٹیم یوہ مقابلو جت غے مقابلہ تاریخ درج کرنو چاوے۔

Announcement

علاقائی خبراں آلا شعبہ آکاشوانی جموں غی طرفوں ضلع کٹھوعہ واسطے عارضی نامہ نگار یعنی پی
ٹی سی واسطے درخواست منگی گئی ہیں۔مجوزہ پرفارمہ ور عارضی نامہ نگار غی پوسٹ مانہہ
دلچسپی رکھن آلا ایسا امیدوار درخواست دے سکیں گا جہیڑا ضلع کٹھوعہ گا بسنیک وین تے اُن غی
عمر 24 براں تیں 50 براں غے بشکا ر وے۔ پی ٹی سی غی اس پوسٹ واسطے تعلیمی قابلیت پی
جی ڈپلومہ یا صحافت غا شعبہ مانہہ ڈگری یا فر تسلیم شدہ یونیورسٹی تیں گرجویشن غے ہمراہ
2 براں غو صحافت مانہہ تجربو مقرر کیو گیو ہے۔ اس تیں علاوہ کمپیوٹر تے ورڈ پروسیسنگ نالے
خبر اکٹھی کرن آلا آلات تے میڈیا کوریج مانہہ تجربو وی ضروری ہے۔عارضی نامہ نگار غی پوسٹ
مانہہ دلچسپی رکھن آلا امیدوار واسطے لازمی ہے جے ضلع صدر دفتر کٹھوعہ یا اس تیں 10 کلو
میٹر غادائرہ غے اندر رہائش رکھتو وے اس سلسلہ مانہہ درخواست غی ہارڈ کاپی ضروری
دستاویزات غے ہمراہ ہیڈ ریجنل نیوز یونٹ آکاشوانی پنچترتھی جموں مانہہ بزات خود آئیندہ 15جون
توڑی دے سکیں۔ اس بارے مزید جانکاری ویب سائیٹ

www.newsonair.gov.in

ور دستیاب ہے۔
